



Sambanwá

GIYA SA PAGSAMBA KAN BANWAAN NIN DIÓS

SOLEMNIDAD KAN INMACULADA CONCEPCION NI SANTA MARÍANG VIRGEN
08 DICIEMBRE 2023 • PUTI

RITO SA PAGPOÓN

Patarátará

C — Kan taon 1854 ipinagdeclarar ni Papa Pio IX an Inmaculada Concepcion bilang sarong katungdan nin pagtubod (dogma) nin lambang Catolico. An boót sabihon kan Inmaculada Concepcion iyo na si Santa María ipinangidam na daing digta nin kasâlan. Sa kapinônan pa sana kan plano nin Diós pinili na si María na magin Inâ kan Paratubos. Nin huli kaini si María ilinikay nin Diós sa kasâlan na original na gikan ki Adan asin ki Eva poon sa pagpangidam saiya. Sa bilog na pagkabuhay ni Virgen María, sa tabang kan gracia kan Diós, dai siya nadigtaan nin anoman na kasâlan. Kaya an angel sa sayang pagdalaw ki María nagsabi: "Mag-ogma, panô nin gracia, kaiba mo an Kagurangan!"

Antifona sa Paglaog

(Is 61, 10) (*Tindog*)
(*Sinasambit kun mayo nin Awit sa Paglaog*)

Tunay na mag-oogma ako sa Kagurangan, asin magrorokyaw an sakong kalag sa sakong Diós; ta binadoan niya ako kan gubing nin kaligtasan, asin pinatos niya ako kan manto nin katanosan, siring sa esposang pinagayon kan sayang mga alahas.

Pagpangurus asin Pagtaong-galang

P — Sa ngaran kan Amâ, asin kan Aki, asin kan Espiritu Santo.
B — Amen.
P — An Kagurangan mapasaindo.
B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magelebrar kan mga banal na misterio.

Gabos — Nagkukumpisal ako sa Diós na makakamhan, asin saindo, mga tugang, ta nagkasalà ako nin makuri sa isip, sa tataramon, sa gibo, asin sa kapabayaan: salâ ko, salâ ko, makuring salâ ko. Kaya nangangadyi ako ki Santa María, danay na Virgen, sa

gabos na Angeles asin Santos, asin saindo, mga tugang, na ako ipamibi sa Kagurangan tang Diós.

P — Maherak man lugod sato an Diós na makakamhan asin, pakapatawada an satong mga kasâlan, darahon kita sa buhay na daing kasagkoran.

B — Amen.

Kyrie

P — Kagurangan, maherak ka.
B — Kagurangan, maherak ka.
P — Cristo, maherak ka.
B — Cristo, maherak ka.
P — Kagurangan, maherak ka.
B — Kagurangan, maherak ka.

Kamurawayan

Gabos — Kamurawayan sa Diós sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamat mi ika huli kan dakula mong kamurawayan, Kagurangan na Diós, Hadeng langitnon, Diós Amang makakamhan. Kagurangan Aking Bogtong, Jesu Cristo, Kagurangan na Diós, Cordero kan Diós, Aki kan Amâ, ika na nagpaparà kan mga kasâlan kan kinâban, kaheraki kami; ika na nagpaparà kan mga kasâlan kan kinâban, akoa an samong pakimaherak; ika na nagtutukaw sa too kan Amâ, kaheraki kami. Ta ika sana an Banal, ika sana an Kagurangan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Diós Amâ. Amen.

Colecta

P — Mamibi kita.

O Diós, na huli kan daing-digtang Pangidam ki Virgen María, nag-andam ka nin maninigong eerokan para sa saimong Aki, namimibi kami na mantang linigtas mo siya sa gabos na digitâ, huli kan pagkagadan kan saimo man sanang Aki, na bâgo pa, saimo nang aram, huli kan saiyang pamibi, kami man na nalinigan warasan na makaabot saimo.

Huli ki Jesu Cristong Kagurangan niamo, saimong Aki, na kaiba mong nabubuhay asin naghahade, kasarô kan Espiritu Santo, Diós, sa gabos na kapanahonan kan mga panahon.

B — Amen.

LITURGIA KAN TATARAMON

Enot na Babasahon (*Tukaw*)

(Genesis 3, 9-15. 20)

Nin huli ta mayo sinda nin maimbod na pagsarig sa plano kan Diós, si Adan asin si Eva naging oripon nin kasâlan. Alagad sa tahaw kan kasâlan na ini asin nin karâtan nin kinaban nanugâ pa giraray an Diós na magligtas sa tawo nin huli ta siya maheherakon.

Pagbasa sa Libro nin Genesis

Nag-apod an KAGURANGAN Diós sa tawo, asin nagsabi saiy: "Haen ka?" Nagsimbag: "An saimong tingog nadadangog ko sa saimong tatamnan: natakot ako, huli ta huba ako, nagtago." Nagsabi: "Siísay nagsabi saimo na huba ka? Sa kahoy na ibinawal ko saido an pagkakan nagkakan ka?" Nagsabi si Tawo: "An babae na itinaid mo sako, siya an tuminao sako kan hale sa kahoy asin ako kuminakan." Nagsabi an KAGURANGAN Diós sa babae: "Ano ining ginibo mo?" Nagsimbag an babae: "An halas, dinaya ako asin ako nagkakan." Kaya nagsabi an KAGURANGAN Diós sa halas: "Huli ta ginibo mo ini, maldito ka sa gabos na hayop asin sa gabos na nabubuhay sa lantad! Sa saimong tulak ika maglalakaw asin alpog an kakakanon mo gabos na aldaw kan saimong pagkabuhay. Papag-iwalon ko kamo: ika asin an Babae, an saimong tinubò asin an saiyang tinubò; tatâmakan ka kaini sa saimong payo, ika na minatukwag kan saiya sa bool." Nginaranan kan Tawo si saiyang agom Eva, huli ta siya an inâ kan gabos na buhay.

Tataramon kan Kagurangan.

Gabos — Salamat sa Diós.

Salmo Responsorial

(Salmo 98, 1. 2-3. 3-4)

S — Mag-awit sa Kagurangnan nin bâgong awit huli ta guminibo siya nin mga ngangalasan.

1. Mag-awit sa KAGURANGNAN nin bâgong awit, huli ta naggibo siya nin mga ngangalasan. Nanlitas para saiya an tóo niya, asin an banal niyang takyag. (S)
2. Ipinamidbid kan KAGURANGNAN an saiyang paglilitas, sa mga mata nin mga nación ihinayag an saiyang kasuripotan. Giniromdom niya an karahayan niyang boót asin an saiyang katotoohan sa harong nin Israel. Nahiling kan gabos na poró kan dagâ, an paglilitas kan satong Diós. (S)
3. Nahiling kan gabos na poró kan dagâ, an paglilitas kan satong Diós. Magpatarátará sa KAGURANGNAN, bilog na dagâ, magbulwang nin kaogmahan, magkurahaw asin magtugtog! (S)
4. Magtugtog sa KAGURANGNAN sa arpa, sa arpa asin sa tingog nin awit; sa mga trompeta asin tanog nin hamudyong magaya-gayang mag-awit sa atubang kan hade, an KAGURANGNAN.

Ikaduwang Babasahon

(Efeso 3-6. 11-12)

Poon sa kapinônan yaon na kitang mga tawo sa isip kan Diós. Kun kaya kaibahan kita sa saiyang plano nin kaligtasan. Ini totoo, orog nang gayo ki María na piniling magin iná kan satong Paratubos. Ngonian inaalok kita na magpasalamat sa Diós sa gabos na mga biyaya na iwinaras niya sato ki Cristo.

Pagbasa sa Surat ni San Pablo sa mga taga-Efeso

Pablo, apostol ni Cristo Jesus sa bagsik kan boót kan Diós. Sa mga banal na yaon (sa Efeso) asin maimbod ki Cristo Jesus. Mapa-saindo an gracia asin katoninongan hale sa Diós na satong Amâ asin ki Jesu Cristong Kagurangan. Pag-omawon an Diós, Amâ kan Kagurangan tang si Jesu Cristo! Siya na iyo an nagbendicion sato kan gabos na espiritual na bendicion sa mga langitnon, ki Cristo! Pinili niya kita sa saiya bago tuggedson an kinâban, na magin banal asin mayong digta sa atubang niya, sa pagkamoot; itinalaan niya kita kan enot pa, para sa kamugtakan nin akì huli ki Jesu Cristo para saiya, susog sa pagmarhay kan saiyang boót, para sa kaomawan kan kamurawayan kan saiyang gracia, na iwinaras satuya sa saiyang namomotan. Sa saiya

nagkapalad man kita na mapili, kita na itinalaan kan enot pa, susog sa plano kan nagpapahimo kan gabos susog sa hatol kan saiyang boót, tanganing mapa sa kaomawan kita kan saiyang kamurawayan, kitang enot na nagka-igwang paglaom ki Cristo.

Tataramon kan Kagurangan.
Gabos — Salamat sa Dios.

Pagrokyaw

(Lucas 1, 28) (*Tindog*)
(*Sinasambit kun dai inaaawit an Alleluia*)

Allelúia, allelúia! Paglaog, nagsabi saiya: “Mag-ogmá, panô nin gracia, kaiba mo an Kagurangan.” Allelúia, allelúia!

Evangelio

(Lucas 1, 26-38)

P — An Kagurangan mapasaindo.

B — Asin sa saimong espíritu.

P — Pagbasa kan banal na Evangelio susog ki **San Lucas**.

B — Kamurawayan saimo, Kagurangan.

Ika-anom na bulan, sinugò kan Diós an angel na si Gabriel sa sarong ciudad nin Galilea na an ngaran Nazaret, sa sarong virgen na esposa nin sarong lalaki na an ngaran José, sa harong ni David; asin an ngaran kan virgen, María. Paglaog, nagsabi saiya: “Mag-ogma, panô nin gracia, kaiba mo an Kagurangan!” Sa mga tataramon na ini napurisaw siyang gayo, asin nagparahorop-horop kun ano kayâ ining patarátará. Nagsabi saiya an angel: “Dai ka matakot, María; ta nagkamit ka nin gracia sa Diós. Uya, mangingidam ka asin mangangaki nin lalaki, na ngangaranan mong Jesus. Ini magigin dakula, asin aapodon na Akì kan Orog kahalangkaw. Itatao saiya kan Kagurangan Diós an trono ni David na saiyang amâ; mahade siya sa harong ni Jacob sagkod pa man; asin an saiyang kahadean mayo nin katapusan.” Nagsabi si María sa angel: “Pâno iyan mangayari ta mayo akong namimidbidan na lalaki?” Nagsimbag saiya an angel: “Sasangkoban ka kan Espíritu Santo asin lilindongan kan kapangyarihan kan Orog kahalangkaw: kaya an mamumundag aapodon na Banal, Akì kan Diós. Uya, si Elizabeth na saimong pinsan, siya man nangidam sa saiyang pagkagurang, asin an bulan na ini iyo an ikaanom kaining inaapod na baog; huli ta mayo ni anong imposible sa Diós.”

Nagsabi si María: “Uya, an sorogoon kan Kagurangan;

mangyari sakuya susog sa saimong itinaram.” Asin naghale saiya si angel.

P — Marahay na Breta kan Kagurangan.

B — Pag-omaw saimo Cristo.

Homilia (*Tukaw*)

Pagrokyaw kan Pagtubod (*Tindog*)

Credo Niceno-Constantinopolitano

Gabos — Nagtutubod ako sa sarong Diós Amang makakamhan, kaggibo kan langit asin dagâ, kan gabos na nahihihiling asin dai nahihihiling. Asin sa sarong Kagurangan na si Jesu Cristo, Bogtong na Aki kan Diós, asin namundag gikan sa Amâ bago kan gabos na panahon. Diós na gikan sa Diós, ilaw na gikan sa ilaw, totoong Diós na gikan sa totoong Diós, ipinangaki, dai linalang sarô sa pagka-Diós sa Amâ: huli saiya nagkaigwa kan gabos. Huli sa satong mga tawo asin huli sa satong kaligtasan naghiligid siya hale sa kalanigan.

(*Sa mga minasunod na tataramon, abot sa asin nani-tawo, an gabos minaduko.*)

Asin nani-laman huli kan Espíritu Santo ki Virgen María, asin nani-tawo. Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong asin kan ikatulong aldaw nabuhay-liwat susog sa mga kasuratan, asin suminakat sa langit, nagtutukaw sa tóo kan Amâ. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espíritu Santo, Kagurangan asin kagtao nin buhay: na gikan sa Ama asin sa Aki. Siya kaiba kan Amâ asin kan Akì, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasâlan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Bilang mga parakasalà, magdolok kita sa Amâ na nagpili ki Santa María na magin daing-digting Inâ kan saiyang Akì, asin mamibi na panô nin pagsarig.

S — Kagurangan, hinanyoga an samong pamibi.

1. Tanganing an mga namamayó kan Simbahan dai nanggad magpabayâ na

makasarô ki Santa María sa pagpamibi asin sa paghagad kan saiyang tabang para sa mapanganang pag-otob kan saindang mga katongdan, ipamibi niato sa Kagurangnan. (S)

2. Tanganing siring ki Santa María, kita magin makusog an boót asin danay na andam sa pag-otob kan katongdan na mámoöt sa kapwa, orog na sa mga daing-sukat, ipamibi niato sa Kagurangnan. (S)
3. Tanganing sa tabang kan pamibi ni Santa María, madaog niato an karátan, makaháwas sa kasálan asin gibohon an satuyang hawak na maninigong eerokan para sa saiyang Aki, ipamibi niato sa Kagurangnan. (S)
4. Tanganing kita gabos magin agosán kan mamomótan na pangataman ni Jesus asin kan saiyang Iná para sa mga naghehelang sa satuyang comunitàd, ipamibi niato sa Kagurangnan. (S)
5. Tanganing an mga nagtalikod na sa kinában magkamít nin kapahingaloan sa kahadean kan Diós kaiba ni Santa María, ipamibi niato sa Kagurangnan. (S)

P — Langitnon na Amâ, itinao mo samo si Santa María na samuyang Iná asin aarogan, na magdanay na yaon sa samuyang buhay, sa tabang kan saiyang mga pamibi, buksan mo an samuyang puso para sa pagbágong buhay. Huli ki Cristo samong Kagurangnan.

B — Amen.

LITURGIA KAN EUCHARISTIA

Pagdolot (Tukaw)

(Sinasambit kun mayong Awit sa Pagdolot)

P — Inoomaw ka, Kagurangnan, Diós nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — Pag-omawon an Diós sagkod pa man.

P — Inoomaw ka, Kagurangnan, Diós nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kafag.

B — Pag-omawon an Diós sagkod pa man.

P — (Tindog) Magpamibi kamo, mga tugang: tanganing an sako asin an saindong atang maako

man lugod kan Diós Amang makakamhan.

B — Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.

Pamibi sa mga Dolot

P — Kagurangnan, kaugaying akoa an nakakaligtas na sacrificio, na dinodolot mi saimo sa solemnidad kan Inmaculada Concepcion ni Santa Maríang Virgen, asin warasan na siring na kami magpapahayag saiya na ligtas sa gabos na digitâ nin kasálan huli kan saimong naenot nang gracia, kami man, huli kan saiyang pamibi, makaligtas sa gabos na kasálan. Huli ki Cristo samong Kagurangnan.

B — Amen.

Prefacio

An misterio ni María asin kan Simbahan.

P — An Kagurangnan
mapa-saindo.

B — Asin sa saimong Espiritu.

P — Iítaas an mga puso.

B — Initaas mi na sa
Kagurangnan.

P — Magpasalamat kita sa
Kagurangnan, satuyang
Diós.

B — Maninigo asin Dapat.

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Amâ, Diós na makakamhan na daing kasagkoran:

Ta linigtas mo an orog kapaladan na Virgen María sa gabos na digitâ kan pinaka-enot na kasálan, tanganing sa saiya na sinamnohan mo kan kapanoan kan saimong gracia, nag-andam ka kan maninigong Iná para sa saimong Aki, asin tinandaan mo an kapinônan kan Simbahan, an saiyang magayon na Esposa, daing gusot o digitâ. Ta an orog kamabining Virgen mangangaki nin lalaki, an daing salang Cordero na nagparâ kan samong mga salâ; asin binugtak mo siyang enot sa gabos na magin man sanang agihán nin gracia asin aarogan nin kabanalán para sa saimong banwaan.

Kaya kairiba kan mga koro nin mga Angeles nag-oomaw kami saimo, maogmang nagpapahayag nin pagtubod:

Gabos — Banal, Banal, Banal
an Kagurangnan Diós ni mga
hukbô. An langit asin dagâ pano
kan Saimong kamurawayan.

Hosánnâ sa kaitaasan. Paladan an minadigdi sa ngaran kan Kagurangnan. Hosánnâ sa kaitaasan.

Pamibi sa Eucaristia (Luhod)

P — Misterio kan Pagtubod.

B — An pagkagadan mo,
Kagurangnan, ipinapamareta
niamo, an Pagkabuhay mo liwat
ipinapahayag, sagkod na ika
magdatong.

P — Huli saiya, asin kaiba niya, asin sa saiya, saimo Diós Amang makakamhan, kasarô kan Espíritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo (Tindog)

P — Natukdoan kan mga nakakaligtas na tugon, asin pinatood kan diosnon na kaugalean, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasálan, siring na pinapatawad niamo an mga nagkakasalà samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasálan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — Huli ta saimo an kahadean, asin an kapangyarihan, siring man an kamurawayan sa mga kapanahonan.

P — Jesu Cristong Kagurangnan, ika na nagsabi sa saimong mga Apostoles: Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasálan, kundi an pagtubod kan saimong Simbahan; asin papagkanigoa na siya mapatoninong asin magkaboronyog sosog sa saimong kabotan.

B — Amen.

Pagpahayag kan Katoninongan

P — An katoninongan kan Kagurangnan danay na mapasaindo.

B — Asin sa saimong espiritu.

P — Magpatinaraohan kamo nin katoninongan.

Cordero

B — Cordero kan Diós, na nagpapara kan mga kasâlan kan kinâban: kaheraki kami. Cordero kan Diós, na nagpapara kan mga kasâlan kan kinâban: kaheraki kami. Cordero kan Diós, na nagpapara kan mga kasâlan kan kinâban: tawi kami nin katoninongan.

Pag-alok sa Pagcomunion (Luhod)

P — Uya an Cordero kan Diós, uya an nagpaparà kan mga kasâlan kan kinâban. Paladan an mga inapod sa pamangi kano Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maoomayan.

Antifona sa Comunion

(Tindog)
(Sinasambit kun mayong Awit sa Comunion)

María, mga mamuraway na bagay sinasabi dapít saimo, ta hale saimo nagsirang an saldang nin katanasan, si Cristo na satong Diós.

Pamibi Pakacomunion

P — Mamibi kita.

Kagurangnan samong Diós, an mga sacramento na samong inakò, magpaomay samo kan mga lugad kaitdung kasâlan, na sa kasâlan na ini, sa naiibang paagi, linigtas mo si Santa María sa daing-digtang Pagpangidam saiya. Huli ki Cristo samong Kagurangnan.

B — Amen.

Gawe nin Pagconsagra asin Pagdusay sa Inmaculada Concepcion

Ipinapanongod na pangadyion ini sa gabos na mga Misa sa Solemnidad kan Inmaculada Concepcion ni Santa Maríang Virgen.

Gabos — Minadolok kami sa saimong pangataman, O banal na Inâ kan Diós, sa pagsayod niamo kaining antifona na pinapamibi kan Simbahan ni Cristo sa halawig nang panahon, na ngonian samong pinapamibi giraray sa atubang mo, samong Inang Daing-digtá. Kami na kabitang kan Hawak ni Cristo sa nación ngonian,

minapamibi kaining Gawe nin Pagconsagra asin Pagdusay kun saen samong tinitipon an mga paglaom asin kahaditan kan mga Pilipino, sa samong kasaysayan ngonian.

Inâ kan samong nación, minarokyaw kami sa tataramon na Pueblo Amante de María, an mga tawo na namomoot ki María. Nasasabotan mo an samong mga pagsakit asin paglaom. Ika na nakakamate bilang Inâ sa saimong mga akì, kan mga pakipaglaban kan karâtan asin karahayan, kan liwanag asin kadikolman, na nagpupurisaw samo ngonian. Inâ kan samong banwaan, akoa an mga inagrangay niamong mga tinutulod kan Espiritu Santo, na isabi sa kararoman kan puso mo, kugosa nin may pagkamoot nin sarong Inâ asin sorogoon kan Kagurangnan, an samong banwaan asin dagâ, na samong itinitiwala asin idinudusay saimo ngonian. Huli ta kami nanggâd nagmamakulog sa dagânon asin langitnon na padumanan kan lambang sarô samo asin kan gabos sa samong banwaan. Minadolok kami sa saimong pangataman O Mahal na Inâ kan Diós, hare mo pagsayumahi an samong pag-arang asin pangangaípo.

Sa mga pagsayuma sa kaangotan, pagkulog asin pagiriwal na nagbabarangà asin nagrurumpag sa samong nación huli sa mga kasâlan, agawon mo kami. Sa mga kasâlan tumang sa buhay nin tawo poon sa kapinônan kaini, agawon mo kami. Sa pag-tûmak kan dignidad kan mga akì kan Diós, agawon mo kami. Sa gabos na forma nin injusticia sa samong sociedad, agawon mo kami. Sa mga paglapas sa mga katugonan kan Diós, agawon mo kami. Sa kawâran nin pag-atid-atid kan marhay o maraot, agawon mo kami. Sa mga kasâlan tumang sa Espiritu Santo, agawon mo kami.

Hinanyoga, O Inâ ni Cristo, O Inang Daing-digtâ, an mga pagarang na panô nin paglaom asin pagsakit kan lambang sarô samo asin kan gabos sa samong

nación. Tugotan mo na mamidbid giraray sa samong kasaysayan bilang nación an daing-sagkod na kapangyarihan kan Kaligtasán, an kapangyarihan kan maheherakon na pagkamoot. Rumpagon lugod kaini an kapangyarihan kan kasâlan asin karâtan sa samo, asin pakamarahayon an samong mga conciencia.

O María Inâ ni Jesus asin samong Inâ, an samong buhay asin kahamisan asin paglaom. Amen.

RITO SA PAGTAPOS

Solemneng Bendicion

P — An Kagurangnan mapasaindo.

B — Asin sa saimong espiritu.

P — Magduko kamo sa pagbendicion.

An Diós na sa saiyang karahayan nagboót na tuboson an katawahan, huli kan pangaki kan paladan na Virgen María, pagkanigoon niyang warasan kamo kan saiyang bendicion.

B — Amen.

P — Asin danay asin minsan saen kamo makamate kan saiyang pag-ampón, na huli kaini nagkanigo kamong magakò kan kaglalang kan buhay.

B — Amen.

P — Asin kamo na ngonian na aldaw nagtiripon sa malodok na puso, mapa-saindo an mga balaog nin mga espiritual na kaogmahan asin mga langitnon na premio.

B — Amen.

P — Asin an bendicion kan Diós na makakamhan, Amâ, asin Akì,  asin Espiritu Santo, maghilig asin magdanay saindo sagkod pa man.

B — Amen.

P — Lakaw kamo sa katoninongan ni Cristo.

B — Salamat sa Diós.



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin JUAN CARLOS R. MADRID, Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy.
Ciudad nin Naga, Pilipinas • 2023